

范

伯

子

詩

集

范伯子詩集八

通州范當世

光緒十九年癸巳六月至十二月作

嘗博用山谷送范慶州韻謝余評其詩因自陳其夙好義山爲之已久不能驟改願以吾說劑之而盛畏古文之難曰形迹易求神明難測余旣面與之諍又次其詩罄余意亦盛夸其辭以爲戲也

世說小范十萬兵不能戰勝徒其名空提兩拳向四壁推排日月驅風霆帳中突兀建吾子忽復自顧大莫京豈無羽翼在天地遠莫能致孤難行語子瑰文猛如虎伏而不出如處女浩如積水千倍餘千一之放流成渠天僊化人妙肌理墮馬啼妝百不須莫學世間小丈

夫容光滑膩心神枯少壯眞當識塗徑看余牛老已垂胡

從騫博借得李尊客侍御詩集卽夕讀其七古二十餘篇不容
不服恨無由見之觀其自序稱後世誰能定吾文者吾自定
云爾則又慨乎莫能禁也獨夜無聊疊兵字韻題其端以示

騫博

東南一老更戎兵四五十澹得名名在世間若遙瑟詩到吾耳纔
轟霆惜哉有言馴不及平生不願識帝京何從衆中拔此老籃輿捧
向西山行山中之人氣如虎帝旁魁梧多好女恠懂一世眞有餘萬
歲千秋不變渠千秋萬歲渺茫事問渠政亦不汝須我生之年君壯
夫君衰我亦形容枯至寶原來還自定有人掩口笑壺胡

寓廬臨河水暴漲沒階尺許而通永道張文筱泉自大趙莊工

次來告以身自臨築河隄阨於風雨悲憫成詩讀之良動人

走筆奉和

朝於枕上聽濤生若有鷗鳧泛嫩晴起看鬢奴成水手暫疑斗室是
蓬瀛過門勞苦單車入到眼憂虞一道橫內自宣南外畿輔幾人歌
哭望秋成

韋平相業再扶天金許聲華四姓連進士十科兼老輩退閒一日總
無錢雲霞釐穀朝飛陸風雨河隄夜聳肩獨有精誠萬無闕任他滄
海亦桑田

伯行南去別恨方長深談不嗣悵然成詩就番舶假硯墨書付
其僕

客如垣積僕如川欲語丁寧百不宣列國戰爭方始耳信陵忠孝獨

天然五千道德規當厲八百孤寒分最先三復樓頭地天語應將別
淚灑江船

俞恪士攜兩俊弟及吾弟仲林書以來喜可知也而天津方大
水又酷熱往還俱不易讀其近作鴨欄磯一首感而和之

跨海越江成此聚附書悲笑更茫茫門才各有三君在生計都令百
畝荒字裏鯤鵬翻積水眼中魚鼈撼驕陽迂生託飽真毋羨虛占成
都幾樹桑

擊父先生以余所寄十七紙詩示叔節中多嘲笑其求官者叔
固憂悲老親而作計恨余言之不見其心也次口字韻問余
余再疊和

正好從容鬪詩口鬪不勝者罰以斗子意學宦如學仙插腳紅塵舉

翼還豈知多少青雲土亘古陸沉黃綬間人生第一飢須饜次卽微
言要人賞知汝活汝良有情安得贈汝萬戶城金昆玉友不在勢傷
哉不得爲親榮我亦與君同志耳可奈權操富人子債臺亦須王赧
爲薛有孟嘗君勿喜君不見蓮池密樹萬鴉攢聒耳通宵不畏彈官
解垂楊低入欄病鶴終年未許攀物有生成我何望萬年長悔不咄
山

魯山青

朝使南者誰何歎都督門前舍人子莫使西者爲誰哉二載前頭發
吾齒就中名士君知誰驚倒孫郎帳下兒江東小兒望塵拜風流儒
雅真吾師我獨低徊五三代世官世祿真無貸瞽子定以皇英升孔
徒只許私恩逮秦皇多端人始狂天地淪爲百戲場情皇玩弄人不

莊青天白日爭迷藏迷藏亦有命星官歷翁來主張亦要而翁積陰
鷺大帝用此爲賞黜惜哉孔父世稱明德馨顏回感自中台星不得
來茲一飛動百年飢向魯山青

以館中分餉之蟠桃轉餉外舅外舅以詩酬走筆奉和

三年次第嘗新果棄核仍看載滿車販豎入金高似斗海人知木大
如魚掀髯一笑榮枯事坦腹真成醉飽餘莫信甘香非盜贖台星今
傍歲星居

外舅爲帆字二十四韻付當世轉呈大人以謝來時之未能赴
約而索和焉當世謹先和以呈

人生各行地浩如觀海帆大者若鵬翼細若兩指摻細大亦已辨遠
近誰能監搔頭向白日皆有雪髭髭賤用鹿皮裘貴者冠岑岳問君

胡不貴命有牢自緘投軀戰洶湧收身寄空嵌囊中忽無寶獨向天
虛剗平心第諸品難言使君凡我君亦定性終身棲碧巖簪裾絕門
徑懷賢動至誠惜乎公不往迎公必腰鐵哦詩送日月讀書惟意欣
前日公渡海隨波有來函恨爲啼不到怪鵲語詰誦烹魚擊肥豕但
厭諸孫饒我讀兩翁作悲如馬驟衝春風在何許海雨盈天鹹山居
日抱甕秋花不滿巖悠悠幾千里坐失當前械矧能二斗醉喜見親
有嚴平生浪圖遠羞著從事衫甯知百不異蕭薤齊筠杉一數當年
耳誰能更畏讒

第十宵之力讀竟義山詩用外舅偶成韻

手攬晴空百萬絲化爲霞綺趁波斯風輕霧軟鶯花笑海大山深日
月知書劍從軍古如此衣冠來夢子爲誰從頭看汝成黃髮浩劫茫

茫又幾移

疊韻廣外舅

酒來不敢公然酌更恨南隣無斛斯長句空如李白好流年只許范

丹知

外舅以歲朝數占流年得句云范丹灰裏卜行藏北來嘗以爲笑

嘗騰一餉真無礙冥合千秋

定有誰直去英靈走塵俗雲林未必再三移

六月三十日外舅以寫懷六首示讀謹依韻次上卽以自壽其

四十而寄示蓮兒俾轉呈大人一笑云

四十又徂半分年恰到中吾生能幾日大概欲終窮蒲蜡昏燈見蒼
蠅曉枕訂淒迷向弧且蕭瑟酒尊空

春多豈吾事墜地得秋心散此一啼恨歧爲萬竅音貧無問仙鼎病
莫憶神鍼一世儒冠下神仙何處尋

借得亭臺兩淨家此暫停淫霖宵汜濫薄景夏飄零何處百枝火流
爲萬點星扶攜一登望冥想忽親庭

捫心亦何事舉足萬無閒江海十年客親庭百歲間南溟書不到西
極淚同潛一飯西南北真成不閉關

相婦聊娛齒依人共訴心地天原各大河海欲同深世老無歧路官
多有笑林舉頭望不極鵬沒夕陽沉

餘勇真當賈皇慈定可希月來欵枕好霞起眺樓宜遞夢還江國投
詩付海湄佛前夜稽首勞我袞師兒

外舅附詩與罕况兩兒亦依其韻相示

自古人高譽始迨至今顏氏有箴瓢魁儒定作蠅前驥豎子方爭狗
尾貂不醉不醒燈半燄如天如帝燭三條乃翁積此光明力拓地成

江去弄潮

外舅與吾唱和一日至十餘首之多揮汗不已內人方諫之而
苦熱題壁又來矣走筆和視內

我是盤中揀餘豆翁如積下最初薪然薪煮豆豆應笑冷竈一烘誰
愛噴

勸進吾當用火爐休將湯祚笑狂夫指天畫地幽囚裏急似中身受
命符

和外舅癡才

癡才不入公卿眼遽爾全癡也不賢誰是夢中誰是覺有時阿堵有
時錢生憎碌碌人間世不見飛飛鶴上仙孤負滿腸風露意黏毫著
紙未能捐

朝來病耳聾疊韻視妻女

相如不與公卿事卓氏無財也自賢我有君臣聊配藥卿留子母莫
塗錢兩餐碌碌生無補一枕酣酣夢已仙且喜五官朝廢一十分煩
惱二分捐

吉日二十七句贈瞽者

吉日初度吾稱翁睡起兩耳減昨聾妻孥喜驩媚吾聽青銅一貫招
瞽朦蕭然病榻施簾權瞽來命坐階當中三絃亦應徵與宮彈出燕
趙男兒風或彈兩雌爭一雄細者瑣碎如秋蟲大亦彷彿江流東我
對此兒悲來衷與之一飯殺饑饉喜我能聽悲汝瞽匪汝實悲悲其
躬汝瞽吾得用汝工資汝飯汝將汝崇我似昨者爲聾聾眼見不得
求童蒙地有百陷天則夢病態變幻未有終闔門老小懸諸空以此

對汝憂心冲那能似汝扶短童得錢歸飽妻子同但解揮絃不送鴻
荆天棘地懂朦朧

七月七日感靈鵲

天上無婚媾靈鵲空中啼飛飛亦何事來啄屋上泥屋上有黃鵠失
路何淒淒鵲向主人道借巢烏林西主人初不憚鵲語真媿媿言語
縱爾巧顏色固已低良知鴉不惡聒耳遭訶詆明年多大風自向低
枝棲低棲那弗智徒侶相招攜咄彼守雌者還爲天下谿

剖瓜卽事

秋高氣始揚剖瓜不在堂上有天蒼蒼照此瓜心黃瓜身一天地青
皮裏黃瓤中有如許子濁亂黃中央萬黑四三白一白肥而長妻孥
指笑語此殆瓜中王嗟嗟汝弗見瓠子用斗量諒此渺小物天豈有

意昌見異把不釋適肖愚夫腸呼奴速進帚掃置糞壤傍

夢中連夕爲詩醒疾留數句睡起而仍失之是晚對月睡在堂
夢得兩聯則立起續成方知夢中與開眼所爲仙凡迥別

眼中俗物未全空一夢離奇始不同璧月愁爲鴉點黑金天喜有鴈
來紅九霄盃影成孤酌萬里琴聲有一宮却下風窻養燈穗照人和
寐聽秋蟲

有餽我香爐者五人不期而至此一奇也戲題一首

香爐五老太離奇各自飛來正一時難怪昨宵天送喜照人燈穗忽
雙歧

相公後園鶴時時悲鳴爲詩問慰之

吾亦平平過胡然爾獨悲門深風豈入口在料寧遲天地只如此人

禽渺不知寒山萬里鳳無術更從之

相汝猶能壽遼天事恐難直須應擊罷更待鳳棲安我有空山榻前
臨大海欄懷歸詎爲妄頭白與將闌

七月十八日晨興叔節率簾以入喜可知也疊夢中詩韻

夢回秋到爽來空一笑率簾子又同今夜月華還喜白昨宵燈燄怪
來紅海枯石爛平生志地大天荒五畝宮骨肉親賢文字美世間閒
殺萬雞蟲

叔節謂我既知通伯深而念之如此其摯也曷不爲詩以問之

用前韻二首

眼有君才未得空五年踪跡恨難同近知兩鬢雪霜白新得一髮花
蕊紅皓月千秋還照汝黃鍾百變詎離宮最憐莽蒼虛鵬翮錯被蒙

莊喚二蟲

吾欲從君蹈碧空
墜鸞駕鶴一時同
風頭楊柳知誰綠
雪裏梅花不自紅
土有惡爲長鋏客
身還怕近廣寒宮
人間獨許悲秋耳
地北天南有候蟲

吾欲日課一詩四疊前韻以速內子

翻水文成脫手空
風光來與海河同
要將短髮絲絲白
付與林花歲歲紅
本以無魚寄人舍
不曾有蠟坐吾宮
商聲各自華天地
那更興亡到砌蟲

贈叔節

莊生記載無不有
仲尼拜倒履綦下
跼展兩足如大山
尼命輕微若飄瓦
以此發憤歸著書
頗以聖情自陶寫
面諛背毀渠已知
鼓舌搖

辱未能啞生成聖盜同一閻再際應防血流蹀

近來湖湘間名士盛傳吾弟仲林廬山詩中有落日一去無人
傳之句以爲蒼茫雄特而以吾弟秋門甘肅詩中天下寒看
逐望齊一語配之此外則盛稱吾婦啼鳥一絕及其碧天雲
淨雪初消又見風吹葉之詞句而吾詩則依然寂寞無人道
者壇坫之可畏如此余乃戲爲折補此數作以爲已有既以
自娛亦自笑云

天邊落日與誰傳天下寒多一望全兩弟雖拋萬里外七言都上古
人前雪天晴到風吹葉啼鳥驚回夢化烟不怖小郎徒阿嫂天吳紫
鳳我堪憐

和叔節次韻陳后山秋懷十首

迢迢君子心鷄鳴在風雨曾參不殺人愛惑投其杼杯樽一以醒萬
事何足數發興青林間風雲鬱高怒

年大亦爲蔽汝甯知吾荒嬉娛雜人事日月從奔忙學亦如遊子終
年不反鄉欺心那可得秘之但無忘

儒家舍伊尹萬古無人耕不信泥塗辱堪爲文字榮園東數十步連
隴蒼烟深俯仰一身在依然名利心

潭潭大府居榆桂分數院貴賤三五人各自把書卷讀書卽有心問
我亦何願我乃稍自警與世固無怨

仕宦如相公始能不爲祿故鄉未得歸亦自懷松菊朝來談海人險
怪不可觸身將安所逃幸不爲魚肉

鯁生亦何事忽在烏驪方胡兒挾彈過笑我儒衣裳歸來對妻子歎

息須眉黃塵沙日裏面頭上亦已霜

文統萬萬年欺人弗可道一炬盡灰之方知孔顏槁及我猶徘徊頭
白歸於掃公等美少年胡然自顛倒

人逐陰陽生萬事苦樂半迄無十分娛吾甯忽焉換亦有老成人悽
悽約同伴依依復幾何芳草可同玩

冀州亦何事棄宦老不歸甘心鬱奇藻短章亦懶爲言懷張夫子喪
陽習家池甯知餓而徙如今知貸誰

我思渡頭翁宜爲眼中仙百錢坐而得更賣南溪蓮往反日三四憐
我屨又穿江湖白莽莽扁舟豈無緣

暴冷和外舅寂寥

一夕驚飈動重棉已著牢清秋胡太短寒日又能高此地容生計人

間薄我曹融融衆香國徒以益吾騷

重陽先二日錫翁以詩問余及外舅走筆奉答遂約外舅登高
眼明常俟月東來一月昏眸復幾開病儘磨人當廢硯醉將何用且
焚燬高衙竹樹窻三面小館池臺水一隈安得大山三百里寒空負
雪見鬼鬼

畏人懂擾喜書來皖北諸姚信有才蘭佩結言君可贈荷衣稱體婦
能裁異鄉情話真無厭際海風埃老不開玉壻冰翁可傷悼天高地
迥一登臺

摯父先生之令郎辟疆髫歲耳以詩文問學於余絕可喜又聞
蓮池諸生言其於尊父之論西學每蓄大疑於心此尤爲非
凡而莫有能正之者余其可不言乎用兼斯意次韻一篇以

賞其奇而補其見之所不逮

萬物蠢蠢人有章茂自教化根陰陽四裔徬徨得技巧刻畫仁義中
人長鳴鳥千年若銜尾奇氣著體交和倡力能海飛不動色浩歌自
與天聊浪懷奇抱鬱爾翁最儒有目者齊相望埋沉一州早自拔舍
澤不露文斯昌嗟汝窳知徑寸稿真於磊塊分豪芒逢時拓奇有深
意言語詭激難可方各陳其端適萬變聖道所以垂茫茫以材自華
不憂世倘若芝草非棟樑吾爲子賢欲拜紀子有過言吾弗匡子之
親乃鳳鳴似我燕鵲耳能頡頏家雞野鴛古有諺奚捨老翼來求王
因風乘潮會至海當前斷港奚宜航要知書爲世人讀大義從此不
可量不然孰得謂汝穉綴句眼見詩騷芳

徐椒岑先生壽詩

有序

椒岑先生於姻戚中爲長者以文學則先輩也而同在羈旅
一城之隔歲時伏臘命酒交慰懽忘其年先生無所請屈於
世而泛泛焉與之湛浮不迂不隨鬻其文取暫給而止無久
計亦無多求焉當世曰若此足矣酒酣談劇問道其生平慨
然承學先生不謂然亦未嘗不許爲知言也九月之吉先生
六十弧旦令子稱觴同人各有祝余亦本昔意成章用博一

懽

雷霆震山嶽不能驚浮漚臨深莫不懼湛鱗獨不憂融風拂膏壤草
木青紅稠樓臺遞歌吹惜晚又驚秋崇高若政徹極縱復何求一言
不死藥墮淚東海頭流光捲人去大智莫能度切身有多寡苦樂斯
不侔豪門金玉海且莫恐見收園傭販水賣弛擔東西遊以茲悟生

理萬金買無愁含靈媚天則冥漠亦不差曷況一身外仍有幾希留
觥觥徐夫子達識高其儔行藏入迂叟亦復通王侯有文之萬世不
與命爲讐家貧任子債老至無身謀親朋惜情話忽聚天一陬城根
菊花酒上壽爭帑耕賤子亦何語但用平生投公母再拒我謂子奚
湛浮憂端太無際生人當自由古之適性者龜鶴腐蟬蛻六十化理
遂四十疑團休但悲吾道細天地良悠悠

攀父先生來止廡廬懽讌屢日而後卽其弟陽信其行甚早外
舅不知猶以冬柳詩來索和也因和而并寄之

一歎離筵各暮遲可憐冬柳路旁枝誰真磊磊軒千載空自茫茫閱
四時客有別腸能貯酒子今交手更流澌正愁陽信春無綠此日荒
寒亦不知

陳介菴太史亦憐相公後園鶴而索拙詩觀之承和乃用乘軒
爲慰勉且詭其辭爲臆對而謬自署爲雜語也疊韻奉答

鶴性若無改乘軒當可悲法爲人所察情與命俱遲嗟子鳳鸞質奚
吾燕雀知蓬山有高會雲路一要之

山水太孤寂懸知送老難豈能無瘠土看汝上長安狡獪作雜語歎
獻憑鶴欄梅尊暫相守春近歲將闌

答詩未往介菴又成二首壹反前意爲乘軒者悲夫翔登金殿
若語難工而驟別珂鄉牢愁不少吾知君意不謂君之反復
也再疊而並誦之

從古金華殿不聞秋士悲漸知入世好仍恨去鄉遲夫子亦何爲所
懷人不知軒渠後園鶴流涕更傷之

界絕人天路乘除亦大難誰支一生事博得兩頭安藹藹花藏塢青
青竹出欄寒宵費斟酌永憶夜燈闌

日與季臯言事喜其意量之日遠次鶴詩又高古過所望和以
賞之

對汝章縫氣真爲紈袴悲翻因聞道速仍恨讀書遲師說鄒三樂家
聲揚四知鵬風九萬里踈怒一培之

自古高明地隆隆欲晦難惟茲五三籍餉汝萬千安新侶亦奇服高
吟同畫欄權輿帶詩味吾意孰先闌

擬陸魯望漁具詩

井序

余讀陸魯望漁具以余之所童而習證以所詠有知有不知
要惟識其大概若滬今謂之斲而昔人之以滬名瀆者今且

爲寰中之耀區瀛海之都會矣時世雖異勞歌則同荒江有
家故業還在不無悲己之辭亦雜矢民之感依題試詠亦十
五篇安得鹿門其人灑然與之同作

網

每懷物之初獨歎網公網聖人師微蟲播毒徧區壤潛機喪萬魚澄
波無一響誰謂詩人慈流膏日同享

罩

詩人亦有懷罩罩遲嘉賓曾斯太平物淪落空江滄波寒下無際何
處藏珍鱗牢籠待得酒漁翁良苦辛

罟

一樣江湖邊謀生有巧拙挾是爲升沉手穿足流血多得雲螺歸少

能致魚鼈君當大網求豈憂澤云竭

釣筒

幽人自無事閒閒理釣筒舟行不到處水面朝無風事在貪廉際身兼動靜功掉頭去弗顧游目思無窮

釣車

秋馬可以騁釣車可以馳歸休飯魚黍何用富貴爲洋洋一波裏塗軌無人知客有提竿反何曾悔路歧

魚梁

飛梁偃波面彌望似叢篠湍急巨鱗順岸坼石門小關空一深入江湖失窺窺有鳥來驚窺悠然去雲表

叉魚

宵中集漁父摩厲各馳騁篝火下澤梁人語下游警區區口腹累精
銳一何遲吾欲天地冰臨淵鑑寒影

射魚

挾矢窺清波跳鱗臥密藻懸知非蛟龍亦自應絃倒行歌銀葦間生
計何草草斯人不卽鹿經綸坐終老

鳴榔

擊汰者誰子容與聽所適已有驚鱗飛潑刺正盈尺吳中烟水鄉事
事教人惜獨夜聞此聲微吟和空碧

滬

有滬江之窮涼波下三泖荒荒百家漁乘潮役饑飽寧知千載後九
域獻技巧長鯨橫海來截竹又能撓

鑿

冰薄日以結下有千尺泥有條有枝葉得此珊瑚樹棲懷安遂爲醜識
者屢歎悽東風在何許須臾死猶稽

種魚

水居千石陂其始亦微弱湖鄉買魚秧同植有佳惡道逢赭衣人命
酒懽然酌不爲長大憂徒知縱捨樂

藥魚

昔人觀打魚猶爲暴殄哀誰歎縱此毒遽令全池災靈犀獨難得何
處無鳩媒蒼蒼號含物對此令人猜

舴艋

浪子載歌舫健兒尸樓船漁家小騰擲亦在波浪前推篷飯盈盜眯

眠拂炊烟曷不乘潮逝冥冥入海天

答晉

崩縱不帶劍削竹不成箠愈不憂詩書烟波無一字何物繫腰間茫然有生理謀生良獨難嗚呼問漁子

大雪欲招閑伯叔節同賞之無所得酒殺而罷而二君乃餽以隻雞胡桃爛然盈案使一日之悶頓解而又自傷其窮也爐傍次仲實松風閣韻亦以懷之

雪壓沙磧填冰川炭火烈烈然至椽敬告僮僕無多然四十有幾方除年要客來賞瓊瑤天譬欲歌吹無管絃對此荒廚連冷泉邛然始悟諸公賢醉卽樂死醒開筵不得有意常高懸君家兄弟俱寒甍凍澤那得波潏潏顧此老醜相鮮妍隻鷄胡桃來佐饘復有樂意縈炊

烟仲也低徊飲盜泉洗心置之明月前夢想吾儕夜不眠會以臘日
施行纏我獨身爲勢利攀可憐終歲如蝸旋

賈齋學士既刻繩吾詩又引申其義至再至三而不厭若以鄙
人足當其直道而拙詩能堪其糾彈者感謝一詩以悲其遇
龍比傷心百不云空將熱血灑吾文十年草莽宜心折千古膏蘭總
自焚不意鼓鐘共昏曉臥看風雨在烟雲何緣老謝人間世長爲糞
泥試匠斤

雪後兩日仲彭乃以雪中兩佳篇督和勉和一首應教因懷伯

行

檐風颯颯搖枯桑寒雀只向窻虛翔迎曦出雲百無力凍雪未凍還
飄揚小儒瑟縮席溫飽乃有詩事須平章鄒生偃蹇枚叟嬾相如捧

簡安逃藏可憐今歲梅花晏老使天地無生香天山佩環亦虛語祈
豐報瑞誰之望阿兄騎驢走山谷悵眺玉宇悲橫茫吾欲年年傍君
醉瓊杯綺食無還鄉

仲實自宛平來津度歲要余專和其松風閣韻余思仲實欲與
之談道久矣恨其來數日而余猶未能從容過之次詩道意
我家骨肉如流川散處不得同一椽子亦作客胡懽然有父兄弟偕
迎年冰雪沉沉四九天要賣名聲歌獨絃只開口湯呼煮泉不見人
謂先生賢欲歸與子張談筵凍月已向街頭懸都門子有論道氈清
言如水交潺湲莫笑齊髡著語妍還能老死汪洋饋門前萬事如風
煙庭有至味甘如泉子心卓立味且前我乃醉倒三更眠純清至濁
無人纏最愁白日生牽攀一若柳絮風中旋

范伯子詩集九

通州范當世

光緒二十年甲午正月至十一月南歸送女湖北作

恪士至自都門以曾重伯所詒詩扇相示且爲致聲問我也我
思重伯久矣自以文正公再傳弟子故於重伯引分甚親陳
義述情無所於讓故次其韻以示恪士且屬爲轉詒

普天徧飫曾侯德一簇孤懸似細腰難向莊生問庭逕虛從杜老歎
雲霄芳椒薦豕將何地大柏棲鸞又滿朝獨有亭亭好孫子手提駭
馬逐奔颺

私淑平生無不在門庭長落每能知葛侯聲譽宜騰翥楚客文章太
陸離豈憶獨居垂老日相呼同謁太初師申詳要與深人處笑謝悠

悠世上兒

子亦深深大鐘似我乃向人衡氣機獨爲此君宜解帶不妨吾道尙
傳衣登車日月雄心改帶甲乾坤老眼稀花下一尊須痛惜焉知來
日不分飛

送方子和之山右

冰雪一身寒徹骨火雲千里日當空飄零十五年前淚還向君前一
灑同

且喜昔賢皆有此更能前路好山多逢郵卽醉無須問斗水長鯨莫
我詞

夜涼雨霽獨行院中乃得灑然滌其煩苦而取外舅所授詩三

紙讀之和其三首

雨餘剛靜夜雲裏著疏星稍稍月痕出依依鄰火青卽事便多暇流光苦未停冥然孤照影愁汝尙亭亭

此地一叢瓦向來千劫沙人烟寒帶樹時雨潤添花微借壁間粉晴烘天際霞直須背放舜母使璧暉賒

擊柝嚴城隔城間尙有人詩窮來乞米吏隱不垂綸一歎危君父千年望帝臣高衢豈猶聘吾謝九方歎

廡廡雜遺十二首次外舅精台雜遺韻以示恪士

辛苦三年枘垂垂欲向園妻孥猶菜色賓客更何門絮影風相定荷聲雨自喧低徊正無事生理日軒軒

客以京塵至避寫逾可憐官真成一笑思有出重淵卽貴終窮好依人望主賢蛟雷夜成市障汝薄羅便

太息幸餘老低樓在此間微吟送日好老境用才閒舊養悲花縣遺
忠託岵山幸翁君不見報國淚潛潛

誰分太平久今猶養五更烏夷窺日影大漢振天聲道好文終敝吾
衰夢轉清頻噓東閣酒成此笑歌行

一生長自廢莫慰老親懷賢壻真無賴昔郎若有階談知天道大夢
想故園佳可歎玄邱逝淒涼范氏街

文字銷憂耳由來古不償尋常分貴賤斯事與低昂積架五千首傳
杯十萬場朽餘甯復起數典未能忘

囊筆爲生事原知作計非何愁終不老祇怯未能歸世業貧深見家
書客久稀塞鴻窮似我所得是南飛

借人臺館住車馬日相過孰謂侯生客能如公子多兩君談寂寞一

侶學蹉跎野有繁花茁園鶯奈爾何

珠桂長安似兼之酒價高傾家已無剩結客那能豪好語咨奴輩忠
心望汝曹主人方嫁女賣犬莫辭勞

有婦好文甚拋書來作家留賓還脫珥愛女代簪花悵彼橫茫大誰
能一葦加無爲動歸興聊煮雪坑茶

一雨屋全漏愁來燈火青曾無一錐地翻憶五霞駟容有馬生角斷
無凰剪翎妻賢不受給獨語竟誰聽

徹骨知無用惟堪細詠同傷心鑿鼓外縮手地天中長落六時水雌
雄二等風不爭將酒待回首陣雲空

恪士避囂而來外舅感時有作諸公發興連詠同於去年余因

懷摯父先生次韻感述

世事又隨春草換，隔年還是腐儒心。爲周有此迢迢夢，不禹何須寸寸陰。倚壁半檠孤照在，當門一雨九河深。正令曉入平津閣，只向青天耐苦吟。

昨夜四星芒角動，喬星亦自亘天懸。瘦童羸馬吾衰矣，服斗當箕事偶然。供缺祇堪煨菟繼，倦來徑欲啖榆眠。驚心殺帝龍飛日，坐嘯承平已卅年。

不信古來喪亂際，沉憂不散會摧肝。殘陽有樹鴉終集，絕島無花鳥盡歡。未必銅山虞細火，豈妨鏡海動微瀾。行年四十何從老，正頗舒眉次第看。

海內甯無惜公者，吾知公用亦無能。身經藥裏剛何病，架有藤花放幾層。梁木一摧無得放，樓窓三笑更難騰。惟須屏絕扶搖意，惻愴南

歸逐化鵬

戲爲徐摯齋題其先德子勤先生所爲十二醜畫冊

小駟襴衫看傀儡惠心妍狀也堪娛參軍畫稿真奇絕待把人間百

醜圖

禹鼎紛紛豈無類化爲粉墨億千身談忠說孝吾知妄此是開天露

醜人

我自平心向牛鼎對人俳笑總餘情齊髡郭秃皆無賴豈惜書生小

醜名

當代徐摯還有子石麟彩鳳自天來勸君收拾幽并氣暫倚談謔命

酒盃

天津王仁安孝廉以詩見投次韻相答

人生不自見百世無人知所以縣崖松亦作青霜姿迷離入花海意
逐東風披令人不自保一旦撒藩籬人娛豈有限但爲斯人悲前民
有戒律儒生當奉持饑餐必麟脯渴飲必華池遺萬而得一此言真
可師世有知我者頭白未妨遲少年有深處却喜我能窺王生造詩
句起落皆崇規昂然欲自惜見可來通詞我有凌虛管子吟爲子吹
發聲天漢上一使風雲卑

恪士止我寓廬四旬日大願余所爲而作詩以堅寂寞之約且
爲我徧教其徒也訓之二十六韻

皇天不示畫上聖不修辭爾我飯牛去焉用曉曉爲大哉文字域奧
絕真難窺茫茫九等味純以聲和之絃將一二竅薄發有藏遺聖人
所自得潑水甘如飴口耳則四寸美實充肝脾臨文一唱歎逐態生

妍媸時流不善學截膏來佐脂猶割虎狼理以飾羔羊皮迂生之所
嘆云云古如斯華鮮愈不得腐朽良堪悲湖南有家法來人多清奇
恪士乃可畏持全抵人嚇悲來必飄忽下筆三五遲是以風雨際歷
弄煙霜姿坐我北堂上召我游徒嬉承之苦不媚擊用醜詆訾我語
諸子聽此事古迷離三公九牧貴而受侏儒欺真能丈夫者世上皆
嬰兒少年有際遇感激爲金椎行乎植汝骨廓汝空中思陳身對霄
壤萬古長軒眉一蠶所辛苦終得衣人肌不得組文繡長爲履下綦
濯髮飲瓜汁甚樂也季臯疑之爲作一詩以釋余之頑鈍

暑汗蒸蒸髮不啟頗以身居垢汚底一朝省得烏能容刻苦低頭倩
人洗申椒菌桂蘅芷菌居然合杳糅吾體奴子復以瓜水來寒似蔗
漿甘若齋忽念此水非人間正用枯藤作根柢花落蒂在風吹之青

青涵虛變芳醴故以二斗奔注胸一氣毋令遁牙繁人生斯世良可悲有己眞應惜糝米昨日妻屬姚君喪是亦頻年謂兄弟撫尸一慟吾已賢畏熱先歸顙無泚今晨相國大用兵故將門前盡彫槩豈無平生一片心且喜從來未傷髀嗟汝迢迢青歲人甯知我老如風遞夢裏嚔吁尙憶親白日思家已無涕

金道堅之爲人余聞之曼君有年今年春曠溪始爲紹介期會於公讌之間然余之往也固已不煩指引而能自得之於稠人中矣曼君之死道堅欲求其女以爲子婦余以是尤切於心今以素扇屬書乃屬馮君小白畫蓬萊旭日奉詒而作詩以道其意

朱家昔動招要意白也今居介紹功君自不煩諸子力我能親素萬

人叢義存死友天無古氣有生民日在東獨歎低徊媚君者飛騰莫
景一頽翁

陳敬如過衙齋共晚餐而出徘徊橋下久而別去歸而遂次其
見投之韻

勞塵入海化爲沙萬劫銷沉更不譁博望再生還有空何奴未滅豈
無家雲天夜醉葡萄酒風露秋開菌苔花斟酌微吟借籌苦宵來一
笑悟津涯

戟門秋水日潺湲宜有寒人著此間冷暖知非一朝事賢愚真隔百
重關瓊杯綺食貪新宴白道青松了舊山願我仍爲好嘲客甯能醉
飽暮無還

貨殖於今有萬都秦皇漢武亦區區偶然道左成君我不值人間論

有無歸對妻孥燈穗大夢驚田舍稻苗枯不知豪俠能從否吾欲窮
山種橐吾

八月五日晚窓卽事

舉頭纖月在殘陽簾密窓疏坐可望四載閒身渾不覺一更初魄已
無光然燈僕從思歸嬾投筆生徒感事忙莫我惛惛竟無辨冥然真
對海山蒼

嘯溪告以集得上馬擊賊下馬作露布左手持螯右手擎酒杯
十八字爲聯頗用自喜而卽夕招飲於酒樓飲罷歎其歸而
閒寂也余因屬其多和吾詩翌日寫數詩以往并用其意爲
詩代柬以謝之

上馬擊賊下露布左手持螯右酒杯四事未能先得半一生無命不

須才坐深且忘天南北
瞻落能禁海闔開
只有吟詩向秋好
君看霜露白皚皚

中秋次韻高季迪張校理宅玩月

我來四換霜林監
魂夢已失江邊嵐
江月沉沉山月小
今皆淪落無人探
浪說吐茵不宜逐
坐對丞相車龕鬢
偷有此廬樂
今夕天與月我相濡
涵月之團團
定何物疑非我與天
能參一片寒冰照
人世却有功用無
求貪著向青天
不可掃朗若大字
題空嵌所以賢愚
各頂禮豈有罵語
聞詰謫我之搏搏
定何物語大足比
書中蟬當年亦欲捨此相
春山夜雨繁苔龕
固知早成定虛願
不得綠髮尋歸庵
靜燈錦瘤要人探
百計不售成枯枿
平生思之但負月
捫心愧對秋江潭
人間佳節復有幾
淪失八九鍾阜南
身獨何爲入囚舍
翻覆自縛真

如蠶祇能磊落對天笑老死寂寞吾何慙焚香徑下婦娥拜臣於萬
物靡所耽朝吟莫吁有述作書生例許爲空談李彪設其范雲嚼豈
論明日無黃柑天有雨風月有關惟獨臣言無二三祝拜而起婦亦
拜拜罷一笑千愁含謂余披寫旣如此孰爲偃蹇停歸驂天寒海昏
怒濤動孤客坎壈眞能堪嗟子斯言吾豈味飛霞旣集誰不諳丈夫
行止有尺寸但惜玉貌非好男長年與人共煙火能無一日同苦甘
何況東兵犬蠶手曾不責我謀平戡精台丈人亦無事正用此際窮
幽覃勸君努力清光下不惜沉醉宵酣博得有情無智慧歲與草
木無邊耗

金道堅生日嘯溪戒各爲一詩而共置酒焉及是日而東征之
師敗報杳來不能成一字矣晚乃就席間疊韻奉詒雖以道

其一日之愁仍不悖於千春之祝

秋暉短短焚膏繼晷盡霜毫無寸功恨不馳探蘆荻壘橫思騎獵蕙
蘭叢揮杯爲爾稱難老籌筆憐渠尙大東四皓由來喪亂際得閒真
作采芝翁

寄某御史

蓋有書來頗持大義而亦以相商故答詩云爾

燼餘士卒生還少孤注樓船再戰無九代垂衣魂夢警卅年補衮血
華枯柏臺尙作棲鳥舍蓮幕終分養鶴符疏有千篇詩百首一般無
用恨爲儒

錫翁貽詩告以六月學生二子而稱其縣大水以故不通問因
訛以倭寇之事余以近所爲詩賦寄之次韻奉答

怪事甯能寫向空班張無奈作玄通更無人似新亭客要與君爲商

洛翁一紙書言家慶事雙珠采躍月明中孩提博有承平望釀福聊
因澤裏鴻

李佑三被劾南歸新吾送之綢繆於此署者屢日新吾笑謂我
彼其兄弟由富貴而幾貧賤未必非好我而然也賦詩爲別
人間一日濤飛海塞上千年鴈叫羣翠袖微霜脩竹染烏衣殘照野
花薰高居夢范偏憐我獨櫂歸吳最戀君能與金昆爲好會直將寒
雪變春雲

吳監泉觀戰於牙山及退至平壤而得優保心不怡走歸乞自
募軍而平壤失相亦不令復從軍居此鬱鬱相與共眺神機
營用新吾韻

君在雲天在草萊深堂脈脈亦堪哀低頭應被祖劉笑攘臂還令絳

灌猜曾此高原九土合能無大海一波回羽林碧樹秋猶爽了可吟
詩略費才

磐碩初自都門聞警將徙家而南約期相晤比來書乃不欲輕
動而和余晚窗卽事以道其意疊韻酬之

日日悲笳送夕陽落帆洲渚鎖相望聽多唳鶴捐虛警睡足珠驪發
舊光離合卅年流覽富升沉百輩死生忙海飛不動天聲作吾友真
能入老蒼

湖北按察使署弔陳友諒墓

落葉空山吾到此頽垣廢塚爾何人沉思祇覺天無意微感應憐盜
有塵東道林亭還寂寂北征車馬日振振江清日煖聊堪笑愴立斯
須亦夙因

年來雖屢與漢陽萬星濤綢繆於津滬之間而不至其家者恰十年矣比復止於其雙梧書屋者兩宵臨別賦詩爲贈

飄飛十載重過汝啼笑經年復此豪一水波濤疑更闊雙梧日月儘能高肝腸帶酒應無剩鬚髮迎霜且自勞會以霞耕來共馭與君揮手謝英髦

星濤之姪萬昭謙亦來乞詩疊韻與之

偃仰當前百不適從容語子忽然蒙六鼈不隔三山近一鶴能吟萬象高子弟承家終不易聖賢拔俗詎勝勞傳聞已解經餘學艱架英英有俊髦

薛次申觀察故江蘇巡撫薛公煥之子也薛公投老所居曰枕

經書屋次申繪圖徵詩感題一首

抱蜀不爲天下用當年四海一居州風雲變態生龍虎烟雨閒情狎
鷺鷥畢竟英雄誰耐老不如絃誦晚無憂低徊世上乘除理盡裏分
明識所由

余以歲莫疾還里瀕發而爲風浪所阻乃又喜與伯嚴兄得稍
聚也撫事有贈

愛極翻成無不捨歸心忽斷喜心回故知雨雪爲期會轉借風波盡
樂哀家有療飢田二頃吾當爛引子千盃菴蘿攀附尋常事鶴與長
松萬古陪

海內飄搖十數公更能堅許兩心同獨成一往翻憐昨鳥有千秋果
慰窮醉把文章傳作笑談將身世渺浮空淹留弗渡君眞善終恐岷
江不再東

內人有詩別女吾亦不可無以詒師曾也遂次其韻

平生冰玉有餘音不覺推移望汝深如此婦翁應可意向來兒女未
關心聖謨漠漠精猶粲人海茫茫血見忱萬事不如文盡寫幾年燕
楚對披吟

乃園梅萼萬千枝寒雨江城入夢思畢竟宦游渺如寄不如此賞淨
相宜明時家國方憂患歷劫文章有陸離再見飄搖定何處懷貞履
道勿須疑

余既與伯嚴稍稍贈答無幾而決行矣攜大集以歸用韻而成
惜今日之作

余獨何爲惜今日支離撼頓一逢見寒江照此雙心合夜雨憐渠獨
角成六籍死灰拚葬送八方兵氣忽崢嶸談餘低首乘流去竊把君

詩海上城

里中歲晚郊行復用伯嚴見貽之第二首韻以寄

眼中騰踏是吾州廣陌眞堪信馬頭百口不如鄉語順一身終共野
翁求新塍覓路依馴犬舊港銜泥遇凍鷗畢竟棲棲有餘戀復從籃
輿夢君游

范伯子詩集十

通州范當世

光緒二十一年乙未里居及江甯至二十二年丙申里居作

至延卿家拜母壽而爲之題客中所畫故鄉圖

一角明霞起暮天
桃花紅雨爛相鮮
由來風景隨人換
不似離家慘
淡年

我亦離茲十餘載
艱難百變始重來
門前似有參天樹
不向天涯共
劫灰

王母雖然鬢上霜
勞人相對感年長
驚心一海身如粟
那更漂搖八
海旁

風雨收身此一廬
來回照影夜燈虛
夢中說夢渾當覺
鄉裏尋鄉計

未疏

約定翻爲流淚言
世間眞乏武林源
從容一夕談何易
莫更開圖戀此痕

和顧晴谷六十述懷詩八首

奄忽不知爲別久
各天相望自年年
憐渠入世將低首
不謂長吟待聳肩
對案自誇連理樹
停觴終感上留田
人情剝盡無哀樂
那不歎歎謂汝賢

南山山翠滿衣沾
難美當時有具兼
醉解煩因如脫鞵
間爭險韻類遭籍
連天宿草今何世
徧地皋蘭路已漸
生死評量阿兄最
贏人十倍取能廉

自我言從李相公
短衾夜夜夢牛宮
進無捷足爭時彥
退有愚心愧

野翁涕泪乾坤焉置我窮愁君父正和戎時危復有忠奸論俯仰寒
蟬祇自同

風雨寒廳擁故氈回腸一夕與冰堅任甘溟濤無還日遂醲醑醑有
醉天窮海蛟螭徒脫網春風牛馬自盈阡心頭歷歷何能說復有陳
生感寓篇

吾土奚爲世所爭迂儒逃責一身輕汝南太守思曹掾蜀郡成都見
使旌誼士定悲言路敗英流誰惜大名成與君同是卑卑者儻爲時
艱喻此情

杜甫歸來詠北征妻兒愁態一時呈債錢萬里知心許買宅一區殊
眼明隨分蝦魚臨水得不材花木亂雲生閒來獨恨招攜少曷不同
歸海上城

爲政風流亦一時悠悠百歲我何持居然有婦如康子頗復驕兒類
袞師別後籍翺從所適生今代厲短於辭饑來共以哦詩樂遏絕母
令後世知

誰能二頃割膏腴兄弟關門絕世途但解楊雄有貞操何曾李白炫
良圖亂餘生計應難問靜者心神固又殊君把斯篇授萍社看渠能
著一塵無

滬上答張幹堂璵

海嶼雪深花盡落問君爾曷到來遲蛟龍豈但魚蝦伍鴻鵠今爲燕
雀知一技可憐窮未改萬方甯有道能隨樓臺結蜃傷心地暫以浮
生作合離

贈張香濤尙書

嶽嶽崇山既見餘，坐看風雪渺愁余。
時剩有屠龍技，乞命來分養鶴符。
道好終於閒處見，談深徒益客中吁。
詩書未必真無用，淚眼乾坤只一儒。

與柯遜庵兄別十二年再晤於江甯而有是作

琴臺一夢江湖溷，鍾阜再來天地冰。
君既生兒差共慰，我除得婦略堪稱。
西無鳴鳥飢誰哺，南有老蛟寒待暑。
等事蹉跎行不得，可憐攀望若飛騰。

香濤尙書將移鎮湖廣而余從之乞近館再呈二詩

詔以尙書還治楚，細民垂泣欲攀轅。
帝將雨澤無分土，臣懼風波有閉門。
近海偷移杯水活，極天終讓一山尊。
韓書三上吾能恥，華髮淒其不可言。

文章自昔爭微尚，顏色於今試一看。那便驚心到譽毀，可堪合眼露
 飢寒。龍非碌碌諸公好，鶴有飛飛八海寬。正苦低回惜同命，斷無長
 缺向君彈。余之來尚書實招之乃交既接而毀言日聞故亦聊有所云以觀其俯仰

旅中無聊流觀昔人詩，至於千首有感於黃公度之人之詩而

遠成兩律以相贈

陳伯嚴贈公度詩有千年治亂餘今日四海蒼茫到異人之句余故感於是而發端也

誰謂君為異人者，我觀君道得毋同。詩言起訖一生事，眼有東西萬
 國風。燕處危巢豈由命，龍游涸澤竟無功。便借鄒子論三樂，也讓行

歌帶索翁

愁來遍攬前人句，讀至遺山興亦闌。容有數聲入清聽，何曾一氣作
 殊觀。乾坤落落見君好，冰雪沉沉相對寒。賸恨楊雲猶賤在不虞，千

世少人看

題其後曰詩意若曰公度之人處於今世則不能異人而公度之詩傳之後世則誠異耳然此二詩乃不能絕佳故知贈送之作必若李白所謂揄揚九重萬乘主謔浪赤墀青瑣賢方足以盡其磊落之概至以同道相贈答雖杜公懷李諸作亦殊乏奇觀何者其氣平而其志莫由深隱也公度以爲何如

戲爲劉錫形題其居停王欣父夫人畫蘭以調欣父

天壤王郎富貴遲重逢鍾阜鬢如絲惟餘韻事鷗波舫手寫芳蘭有萬枝

由來諸子是蘭芽筆下英英盡著花亦有文房善培養只除老鳳不須誇

修羊瑟縮知無幾贏得生綃貺異珍莫笑范丹輕點綴異時加值一

千縉

余以歲暮厲金陵無聊而爲劉園九老圖作序序成而感不絕

益次其詩

不道吟懷逐日殊迂生亦自恨爲儒何曾肝膽非人世徑欲鬚眉入
此圖蘇季名聲焉用大馬卿車服爲誰都但看諸老能蠶醉賤子猶
堪一一扶

由來欲語竟無僞莫問清流更濁流迷眼黃塵能百丈誤人青史已
千秋存亡大事直如此飢飽餘生遍可遊野有桃符知換歲山農聊
作太平謳

贈王賓基篤基兩生

我之徒曰李剛已頗損梅曾拜韓李我有兩子罕最佳汜濫周秦漢

諸子亦若我壻陳師曾非角聲名挂人齒茲皆足以娛吾年老死蓬蒿弗恨矣何哉訪舊來汝門見汝兄弟竟如此詩有不煩繩削成胸襟所懷益奇詭莫我歲晚窮途間昊天哀憐用相侈百夫之特千人英看我從頭下鞭箠汝賓生是穠華才屈宋班張惟汝使弗於郡國擅風流要向明堂歌喜起汝禱得氣滋益多已有清言發如水此宜拓地成河江眼底一泓烏足喜噫乎得師良獨難古有高才化爲俚我之得汝魚水論汝亦應將風虎比記取人間又一時不信吾門僅三士

夢中得一絕

洋洋荻浦鷗翻入漠漠平林鴉暗棲惟有高高夜來月照他獨鶴一聲啼

讀曾文正道光乙未歲莫雜感詩慨然畢次其韻十首

作者天人去不還世間餘我小偷閒
懷風黯黯青燈字負雪冤冤白
下山貧賤幾何身亦老文章無用臭
相關涼涼後死君知否六十年
光指顧間

營營百族自爲家亦有瑰文各自華
時晚偷爲一切計雪深誰是萬
年花人情見好惟朱紱物態籠詩有碧紗
行矣歸休無一可寒溪聊
把凍魚叉

六朝煙水餘蘭漿九度霜風困棘園
直自科名拚永棄於今歲莫轉
忘歸龍來溷澤魚應笑鳳去荒臺鳥自飛
勞苦諸生頻減酒噫嗟吾
道尙傳衣

上焉雲漢駟虬征下向滄溟掣巨鯨
往矣平生真自可悲哉寸步莫

能行縞廬寒雪一相弔號發陰風百不平最恐娛懽有同盡隔年春
不到寰瀛

吾友真能蹈大常一生袖手弗奔忙皇天獨把斯人厄比歲連將諸
弟殤未免親朋來勸駕誰能傀儡再登場人間笑罵今逾我忍盡寒
儂道不光

遷史由來竟謬悠諸公直筆紹春秋是非各以麟千載今古原如貉
一邱掉尾長鯨歸上國垂頭大鳥集神州閉門忍死誰能免遍地荆
榛何處遊

吾儂萬事總蹉跎忍更聊浪學放歌正苦夢深求醒未可憐歲晏得
閒多願爲馬走顏滋戚柔若鷗虞齒竟磨海上鯁生細鱗耳倘將茲
憤向龍巖

客堂豈免食無魚諛頌偷私百不如暮夜却金甯足道亨衢懷寶未
云疏和親自古爲中策封禪誰知是謗書磊磊一腔男子事祇留自
賞弗關渠

剪燭重吟太傅詩雖然少作耐人思有生不與此公值竟死毋爲流
輩知北海豈煩涉南海西施何以學東施從今筮得天山遯清濁茫
茫付兩儀

柯蔡當年誓爲好王黃二子結交纔焉知盡識愚心否且喜眞能笑
口開不覺歲除爲此別未緣饑死會重來曉曉復有一言贈何處人
間無雉媒

劉園五老招飲於李蔭唐齋中饌極精卽席賦謝

一范窮愁正無奈天邊五老忽飛來百年人物無羈氣八簋調停有

俊才渴口逢羹湯沃雪空腸得酒水鳴雷勢交利接黃塵滿拜德尊
文此一回

有所憤歎再次曾文正後歲暮雜感五首

到眼不可耐君猶何事忙戎夷交狎侮婦稚亦猖狂世有臣忠厲而
將國難忘文思誰作俑吾欲問陶唐

重門洞豁豁廣路一條條歌哭餘三戶英靈赫四朝泰山頽莫仰衡
嶽氣應消開府今之傑將何答舜堯

四載熱邊過死灰終不溫窮飢焉有道禍福固知門執國無中立憂
讒遂負恩誰知九州錯鑄成一寒暄

全海不得有能爭彼一隅古之俠烈士不在康莊衢大木從根起好
花須葉扶君知才竭否墮地盡爲儒

淚有不濟處發聲仍一歌哀絃原可聽雄劍未須磨人弱將天困醫
多奈病何吾知百無用徑合死巖阿

次韻王欣父三郎賓基

乃父千愁興不闌更能爲我薦春盤莼羹鬱鬱撐腸入蘭玉森森滿
眼看大德固當爲左券危時何處不南冠與人無患世無競羅雀門
庭來杜韓

吾觀叔也爲雄句破險椎幽各造端曾是小松二三尺俄如修竹萬
千竿時無他助借山石聖有微言觀水濶徒博王生老人喜勿愁范
叔故人寒

欣父席上戲述

違心不是陳兄肉可口真如宋嫂魚怪底王陽能駭俗尉人亦自門

羸輸

余辭金陵從新修馬路出城口占一首示王生

廣路悠悠八尺強沿緣夾道盡修墓名都十里埃塵靜開府一年心力長瓦礫知隨陶甃去輪蹄紛及孔輿忙問津且喜無煩爾免被耕夫笑一場

下關暹番船再作

嵯峨兩鬢雪山白飄泊一身江水寒送別門生悲杖履迎談津吏式衣冠腐儒拙分能相告亂世浮名不自安且喜茲遊未云滯早歸負米博親懽

李草堂丈來餽海鮮索去年詩扇遂書二詩并錄近作

海鮮入朝饌詩老年停舟奚以隔年負而忘暇日謳謀生有飢飽學

道與湛浮羸得心聲在能關作者不

淑氣天所與承之老不衰興隨春水發思與暮雲遲瀕海孤居在橫
流一杖支筵幃吾極樂來與老親宜

與內子登狼山遊讌極樂內子先有詩而余次其韻

世態更改年復年山色向人無變遷所以古之倦遊者往往歸結青
山緣嗟我蓬飄二十載今來共爾東南天越從戊子作重九十年不
履茲山巔春初與人觀野燒賓從雜遝如流川此間豈容爾我迹輾
轉期待秧分田山空人靜雜花發攀登一覽心懽然平時未知缺幾
許及此方覺吾猶全身之得閒賤亦好飢飽在後何須錢惟以佳人
古難得同時郭李云如仙白頭相守亦相喻此樂未被旁人先三千
大千泡影置當時如來豈不賢四十年間阨窮漠漠惜無此趣能少延

如今與爾共生滅在家何取忘家禪一日看山未云少百方清興來
連連浮雲已向空中失落日猶在天邊懸臨門一照長江水人與山
容皆靜娟

是日也內子先歸余留與山僧海月爲連夕之談蓋不宿茲山
者十七年矣海月多詢世間事余乃疊前韻示之以詩

山中一去知幾年深谷大陵坐而遷閒人不與興廢事歌場舞地稍
沿緣傷心涕仰不可說萬事人孽奚由天星火能成燎原勢寸木可
置岑樓巔精衛銜深碧海底杜鵑啼徹東西川嗟我於人在誰數身
所得保惟硯田妄論是非益可笑就徵聞見心赧然惟有舊吾向妻
子征車一拂寒饑全此誠固然何足道那辦人謂公多錢人間肺腑
各殊狀壞若奇鬼嬾若仙或爲鼠目寸無見或復智出靈龜先令汝

何心亦有問周知世事烏爲賢東山涼月向西嶺君宜火速清樽延
天崩地塌細故耳徑可了却無須禪當時黃泥隱吾蹟三月五月懽
相連馬王故人盡偃息吾若虛幌茲猶懸可憐對面成老醜感歎臨
風懷麗娟

延卿讀吾夫婦山中詩而有贈次答并泥其行

忽憶年時結交早我自童孩君亦小低首風塵三十年歸來拂面猶
姣好條支弱水事荒唐員嶠方壺亦虛渺惟有沉沉對榻心時夜無
言入幽妙那弗撐持譽毀間祇能不使憂來惜人生墮地饑爲患攬
食紛紛用牙爪固知一飽懽無餘剩欲飛騰詎難了我自哀吟風德
衰剪翎送籠願看鳥涕泣低回未死身譬已先秋望春杳蓋地繁花
既作泥一命輕微亦如草好人好山天與之展玩斯須殆爲寶君來

况肯和我歌百壺吾欲爲君倒更待山中十日遊出門還家各自擾
與君形影暫莫分且待梁間燕難老

僕婦彭氏余夙聞其備力事舅姑茲其來書言頗罄餘貲爲父
母營葬而乞余詩以道其勤苦云

匹婦誰能侮民彝亦在茲艱難完爾分辛苦望吾詩遼海爲家日荒
江別主時向來原可念矧以善來貽

奉和外舅都門寄詩用辭某某君之聘兼述近况寄懷昔日天
津諸公

月至中秋夜當午遠望長吟思益苦折翮分飛路幾千素心寥落人
三五竟無書來事可知各自低頭拜僉父丈人一官尤可憐譬彼枯
苗望時雨醉後猶吟索米詩夢中莫聽回帆鼓昔日同羈東海頭曾

於高阜懸清眸朱門水閣炎炎夏客館疎簾脈脈秋但道愁人設心
早當機一發事如流安危不知燕巢幕饑飽無用懸在鞢吾徒默默
有去耳豈曰四海無人投逡巡再至風塵下北海南海竟風馬劉表
依然享盛名葛亮何能擅奇雅淹淹故徑被皋蘭寂寂芳洲懷杜若
已知辨俗各龔韶更弗將蟲語冰夏端居窈窕誰爲容秋山突兀撐
晴空夫婦吟攜薜荔徑父子答和蒿萊宮息心已類籠中鳥舉目忽
覩天邊鴻辭親弗復能千里食我誰當以萬鍾寄語宣南念我者謁
來貧病味加濃果然嚼菽能爲子且復含飴學作翁

疊韻速內子和章

人生所遭有舛午正足吟詩相勞苦不見而翁飢困餘唱到城南天
尺五馬卿畢竟未空居葛生且喜吟梁父昔之達者今人英各有低

回在風雨事雖未易一二言氣亦何妨再三鼓我欲直登天上頭攀
天下視徒昏眸五雲輝滅海色暗一樹飄零天下秋試想賢愚定何
物只今涇渭已同流鶴有乘軒坐糜俸鷹有調馴不去韉燕雀紛紛
噪餘粒老鳳茫茫何處投我欲低心隴畝下譬以耕犁屬之馬手足
終難任苦辛草茅亦但資風雅逝將入道味真玄卽欲逃禪無般若
祇爲儒冠誤此身俯仰依人閱冬夏朝來默默窺天容寒氣肅殺凝
高空初筮已廣履霜操微陽未入黃鍾宮江湖莽蕩百物醜翩然照
水無驚鴻問君胡爲不自喜冒此靈秀天所鍾觴有薄醪可以酌池
有蓄墨方酣濃天南地北愁無限火速成詩慰兩翁

晚過延卿廡見其日間所爲雜詩感誦再三援筆和之

不道年年哭笑同相逢更不論窮通逆天作計吾何惜萬古無如江

水東

卽將來日付蒼茫轉是安心第一方山鬼有靈知慕予水仙無位亦

稱王

楚南石多纔少人祇今頑石獨吾身空庭夜氣涼如水偃仰滂沱有

鬼神

俊遊奚事馬蹄驕亦弗湘波訪二姚眼底欲成悲壯事相携同看海

門潮

喜叔節來而讀其詩益有感於時也贈之一首

江回海合夜臨城月落烏啼夢乍驚喜以西風成興會恰看東日與
光明沉疴往復歡能解舊學商量淚轉傾不必有文如庾信已知蕭

瑟送平生

賀李草堂丈七十自壽卽用書懷

問君何術得遐齡長向樽前醉不醒世事已隨流水澹筆情遙與海
天青流傳不必邀聲譽雕琢何曾礙性靈今日哦詩在蕭寺天邊應
有伍喬星

人間攘攘此何時宛馬西來萬謀馳奪爾詩書甯不餒顧茲吟弄得
非癡儀秦有約終須敗管葛無才我自知浮海入江無不可南山片
石是吾師

刻意爲文亦損真空持蠹簡不能神無端頓失平生技念我何爲今
世人感激應成臨路歎迷離終作別家春宵來一夢侵寒怕冰雪樓
臺却絕塵

安得審韞侍几筵醉留親客話窮年故家喬木皆何在寒月梅花不

似前白髮最能齊得喪黃塵終不別愚賢閉門曲盡人間樂一物能

慈信有天

范伯子詩集十一

通州范當世

光緒二十三年丁酉里居至二十四年戊戌廣東作

苦雨不寐太息作示內

夜雨連綿復侵曉予懷落莫更憐卿年饑豈少一盂飯心死誰爭萬
口名正以海渾魚欲逝顧茲花落鳥難鳴人情各有銷魂處吾獨誰
爲遣此生

次答延卿莫春見懷之作

臥想前人底用書沿緣真到禍來初彌天事業君無望似水情懷我
不如風馬談心猶可及雲龍喪氣欲何噓今來略解淫荒趣悔不身
爲竭澤漁

鄉閭排日作餘春喜笑悲憐未失真不信埋藏能卽死由來昏憊亦
通神米鹽瘁矣鸞儔老城郭非歟燕壘新撫惜流光豈勝歎酒餘糟
粕是吾倫

秦州官廨乃十八年前親見程悅甫刺史創造落成者今以陸
筆城刺史之招而復來此撫今追昔愴然成詩

程鄭當時費萬金再來桐樹已成陰百年聚散堪僂指一士升沉尙
痛心明衷街已矣少年垂老盡依然淮水到江深陸侯情重今如許
聊以高齋續舊吟

題故友文右泉花石畫幀與延卿同作

昔在湘南得此人携歸石室伴吟身摩挲未解飢寒累獨使東來畫
有神

吾去天涯能幾歲君於吾里變新陳祇今便覺錢難買一石一花都
可珍

顧子蒼然非好事當時亦獨此人親人間意味知何物不必蚩蚩問
夙因

愁裏生涯原是幻醉餘感歎亦非真何妨更以吟兼畫併作千秋紙
上塵

項晴軒以所藏先勛卿公手書卷子及舊刻顏書裴將軍詩命
其子本源來學將以爲贄賦謝一篇

項君好古羅奇珍異字名迹芳紛綸項君有子亦瑰寶遂與顏閔爭
爲人君蓋未知其子美亦欲使之來問津聞吾斯言倒相屬惟恐此
諾非純真有題東林尺二卷乃我先德明孤臣亦有顏書四體字世

間舊揚無其倫此皆君所自怡悅與人論值能千緡豈使其兒賢諸
我割捨重器如微塵所云非望得之易那無忌妬招人神且喜郎君
菽亦好前日所見苗懷新成之非獨損君竈亦使吾老愁當仁以此
較然信可及永保君既無沉淪振衣遂拜百年賜作詩一緡平生因
次韻外舅竹山君南漳寄懷之作

貧深絕計慮病久無胸期有生各自保亦復何傷離偃仰庭蒿間覺
夢皆遲遲昔遊之所得既見吾生微東方答客難譬彼駕令飛官卑
問遺行此語今亦稀杜甫有拙性自比傾陽葵葵心若無改汝甫將
安歸廢然罷詩卷拂拭辭書幃何哉竹山老復作吟相依

竹山我婦翁作詩念其靖哀哀上吟賡倡以百計欲語兄弟行留
心記篇第雖無偶語禁懼有連殃際凡今章縫人一一可悼逝而我

亦何爲追涼趁背瓣都門弟有書寬言釋離袂苟竊科名間且以永
今歲來日誰知之毋勞遠心繫

東郊夜行

東郊夜行路一水阻前津擊柝是何處吠厖遙與親繁星開笑口獨
樹儼吟身回遠亦何礙毋勞問睡人

輓徐芙雙

城郭諸徐零落盡相逢藹藹獨斯人曾無急行夸吾黨素有閒情樂
我親半菽從來知冷暖一炊俄已變新陳臨歧恨抱經時病試數殘

更淚滿巾

余方臥病君從吾大人嬉至二更
炭作命僕逸之四更反而君逝矣

少小聞君友悌聲幾年遊讌共君昆閒時備識怡怡態別後同談鬱
鬱情八口長饑無療術百年短夢有歸程驚心一夕鴿原痛兄弟真

當五畝耕

故人子弟豈無才死卽蕭然盡可哀惟有徐卿兩郎在能堪范式一頭回羣公各以艱危起百福都從孝義來聞善有基應破涕從今門巷不蒿萊

將之廣東與州牧汪君及季直宴集水心亭用得諦觀汪君之雅意并有慨於席間所談賦贈三首

莫怪鄉賢人不識茲樓吾亦澹忘之行行復有幾千里戀戀纔能一二時草樹盡含良牧意風煙長繫旅人思異時潭水縈歸夢應拂沿隄柳萬枝

一樹頽然臨水折自公培壅復欣欣固知凡物有生理安得盡人如使君叔末年光更無賴腐儒拙分益何云殷勤欲問天南使星火來

徵詎有聞

海舶朝停午市譁紛然時局已如麻君猶欲穩中流舵我乃愁無下
澤車舉足便應身似梗當筵猶喜藕能花行吟坐嘯皆無賴且把無
涯作有涯

余以許仙屏中丞促赴廣東至則渠以裁官去矣初宴賦贈二
首

雲來會與龍爲戲天外橫風吹斷之豈有厄窮如賤子更能好會在
今時還家笑樂千山待爲客倉皇四海知一展平生吾已幸不妨覲
拜話將離

生晚十年吾已矣居常默默問湘源雲龍鳥後無奇紀風馬牛間有
舊恩翕合文章真欲涕迷離家國更何言天南忍死須臾住隔嶺相

看道履存

七月三十日疊韻書懷

今日普天還舊政先生所挾亦何之平生爲口無多望逆旅驚心又
一時人去誰憐屋烏好詩成愁有蟄龍知無言百怪生南海赤縣神
州遍陸離

大地橫飛千尺水誰能一一問根源山川老矣還多事天地茫然欲
少恩容易豈能除漢過等閑何至託堯言若非硯墨猶相活刮絕吾
文更不存

讀裴伯謙兄詩卒業題句

伯謙爲詩故不伐閒心偶遇春華發泊乎憂患走滄溟亦有雄文在
飄忽嶺南六年君始奇吏才每共詩才竭骨底寒深氣益高積水一

輪秋後月

爲莊秉瀚題其外祖張仲遠先生道光戊戌海客琴樽圖因有感於時事卽以砭莊生之狂

秋盡寒生日月邊對觴誰免百憂煎却從畫裏論儔侶正得壺中有地天信使莫先箕子國文儒各以鄭君傳琴樽諒在羲皇上可但區區六十年

莊生識古便能狂及我流連大父行才士本爲時貴賤冥心忽與世低昂臥聞燕市前宵雪坐覺羊城八月霜爲愛遷書語楊幼人間無地著哀傷

九日登白雲山最高處弔燕市諸人

千里百里風淒迷自成俗祇有飄飛萬里身走入衆中無縛束一歲

兩歲間沿緣遞歌哭祇有埋藏百歲人每日看山猶不足我行亦何
意忽在天南頭登高作重九遂入番山幽四山丹聖盡邱隴壯者或
是公與侯能仁一寺在山罅門前豁見江天秋田疇蒼然稻三熟忙
戶飽煖真無愁何哉粵人好作亂輒出擾我東南州人之有才不自
已仍視風俗爲剛柔尋常聖與盜截然如異才藉令易置之何必如
是哉水土浸淫耳目染敢作狂欺蹈深險風之所至衆趨之飛蛾歷
歷投凶燄嗟哉誰是好人雄豈有大略煩諸公眼前寂寞不可耐使
我哀吟空如中

更爲秉瀚題仲遠先生比屋連吟圖依梅伯言同風二韻作四

絕呈其尊父心嘉司馬

學子論文各殊異庭堂至味總齊同平生最有池塘興祇覺神傷柳

絮風

說到詩書金玉賤讀書那弗一家同吾家姊妹皆華萼不獨怡怡鍾

郝風

吾婦能為擘窠字規撫若與婉紉同昨來叔重評詩句言有采蘋王

氏風

婉紉仲遠姊適孫者共許頗為賢人
居奇采蘋仲遠甥也許仙翁刻其集

桐城派與陽湖派未見姚張有異同我與心嘉成一笑各從婦氏數

門風

留別伯謙仲若二十四韻

別離長情懷疏澹益交道所以此番來有逾向日好堂上天人姿惟
我識淵抱至足猶自強造物不能老吾兄昔嬾吟與我共郊島勢驅
來官中志動立起稿沉沉百察底昂頭有蒼昊倦極一相娛窺魚驟

依藻令弟非世人天性日浩浩愛兄並憐我晝夜間寒煖我崇堂上
心與以學相保詩書百年物終焉弗論早我弟新入官此獨愛心搆
仕學兩茫然舊德慮難葆黃河青岱間行迹復草草想見兩老人愁
添鬢邊皓嶺表繁花時江南雪已縞寒衣且寄渠誰能問梁稻感此
迫欲歸所業須後討無爲惜暫分來旋速於駢人間孰愛憎緣意作
喜惱意輕泥沙如意重卽瑰寶世事雖忽焉至情未顛倒豈其閱茲
懼而令迹如掃

盛季瑩招飲贈詩且有相從爲古文之語次答二首

海關山遙有萬程何緣殊俗得同行故知靚面能尋味不必將心與
締盟僕僕經過幾行省姝姝還是一先生微吟得自市聲裏甯用幽
谿懷釣耕

驛路梅花發幾程
離亭張宴酒初行
逍遙鵬翮吾知反
浩蕩鷗心汝可盟
謀稻終成無奈計
爲薪亦是有涯生
居今獨喜身猶賤
誰者能從卽耦耕

觀伯謙斷獄退而飲酒方知是日爲其生日也詩以祝之

萬衆喧喧堂廡開
一人靜者氣逾閒
何曾快意施醲化
但有傷心爲梗頑
四海祇今膏血盡
百年容易鬢毛斑
傾盃祝汝詩千首
臨老分吾江上山

從方子順手中讀李燕伯索和之二絕因知其爲人走筆和之
擾擾紅塵有萬心
門關界絕不相侵
何緣一照明河水
同入人間芳樹林

秋風悵眺越王臺
求友哀鳴識子纒
聞道欽州賢刺史
剛從雲海洗

心來

題如臬縣尉王復初手寫一生辛苦臥秋風圖意

亂世爲官不救貧丞哉不用況沉淪
雲賦筆銷難盡猶有湖州鈍
道人

苦辛甯用棹耕牛嘆鳳嗟麟死亦休
飽飯南岡沉慟語君看滿地稻

梁愁

健庵題有識字耕田無一可最
難飽飯臥南岡二語故和之

風波

風波纔有幾四顧已無人獨以聊浪意
當茲與海親坐須長夜旦行
數舊年春貧賤吾真可逢危門健身